



Inatsisartunut ilaasortaq  
Akitsinnguaq Olsen, Siumut

**Naalakkersuisunut apeqqut: Inuk 18 sinnerlugit ukiulik assersuutigalugu suliffissaarunnerminut atatillugu qaammammut qanoq annertutigisumik pisortanit ikiorsiissutinik tapiissutitaqanngitsunik tunineqarsinnaava?**

27. jan 2012  
Sagsnr. 2012-060821  
Dok. Nr. 810849

Postboks 260  
3900 Nuuk  
Tlf. (+299) 34 50 00  
Fax (+299) 34 66 66  
E-mail: [ikinn@nanoq.gl](mailto:ikinn@nanoq.gl)  
[www.nanoq.gl](http://www.nanoq.gl)

Asasara Inatsisartunut ilaasortaq Akitsinnguaq Olsen, Siumut.

Inuup 18-it sinnerlugit ukiullip qaammammut qanoq annertutigisunik pisortanit ikiorserneqarsinnaanera pillugu, assersuutigalugu ineqarnermut tapiissutinut, innaallagissamut assigisaannullu tapiissutitaqanngitsunik kiisalu annertussusilerikkamik ikiorsiissutit ilanngunagit, apeqqutigisannut nassiuqqartunut qujanaq.

Aallaqqaasiullugu oqaatigineqassaaq pisortanit ikiorsiissutit pillugit Inatsisartut peqqussutaanni ikiorsiissutigineqartartut aningaasartaasa annertussusissaat aalajangersagaanngimmat. Aningaasat inuit ataasiakkaat atugarisaannik naliliinikkut aalajangerneqartartussaapput. Naliliisarnerup kingunerissavaa qinnuteqaatinik tamanik ataasiakkaanut naliliisoqartarnera.

Assigiinngitsunik pingasunik pisortat ikiorsiisarput. Tassanngaannartumik pisariaqavissumik pissaaleqilernermit pisortanit ikiorsiissutit, pilersuinermit akiligassanullu aalajangersimasunut pisortanit ikiorsiissutit aamma aningaasartuutitut ataasiakkaanut pisortanit ikiorsiissutit.

Tassanngaannartumik pisariaqavissumik pissaaleqilernermit pisortanit ikiorsiisoqartassaaq inuussutissaqartitsiniarluni ikiorsiissutitut. Pissutsit imaalinnaapput inuk tassanngaannartumik atugaqalersimalluni pisariaqavissunut soorlu nerisassanut, kamippannut, atisanullu allanullu akissaarussimalluni. Taamatut pisoqartillugu kommuni inuup najugarisaa pisariaqartitanut tamakkununga ataasiaannartumik aningaasaliisinnaavoq.

Pilersuinermit akiligassanullu aalajangersimasunut pisortanit ikiorsiissuteqartoqassappat tamanna sivilisinerusumik ikiorsiinerukkajuttarpoq. Qanoq annertutigisumik pisortanit ikiorsiisoqassanersoq pisortanit ikiorserneqartussap inuunermini atugarisai, pilersuisussaataanera, najukkami pissutsit kiisalu inooqatigisap apparisalluunniit isertitai aallaavigalugit missingersuinikkut aalajangiisoqartassaaq, takuuk § 13.

Pilersuinermit akiligassanullu aalajangersimasunut taamaallaat pisortanit ikiorsiisoqarsinnaavoq ilaqutariit pisariaqartinneqartut inuunissaannut kiisalu ineqarnermut pissusissaatut aningaasartuutitut, atuinermut aningaasartuutitut aningaasartuutitullu allanut aalajangersimasunut, takuuk § 13, imm. 2.

Aningaasartuutiviusut tunngavigalugit kiisalu najugaqatigiissinnaanermi iluaqutissat aallaavigalugit aningaasat aalajangerneqassapput. Immikkut killiliissutitut SIK-p Naalackersuisullu akornanni isumaqatigiissutit malillugit ilinniarsimannngitsumut aningaasarsiarititat ikinnerpaaffiisa 65 %-ii ikiorsiissutigineqarsinnaapput, takuuk § 13, imm. 3.

Akiligassanut aalajangersimasunut pisortanit ikiorsiissutit kommunip annertussusilertussanngorpagit tamatigut nalilivigineqartassaaq akiligassat pissusissamisoortutut isigineqartariaqarnersut. Taamatut naliliinermi kommunip pingaartissavaa qinnuteqaateqartup siusinnerusukkut nammineq isertitaminit akiligassat akilertarsimanerai aamma inuup siunissami akiligassat nammineerluni akilersorsinnaalissanerai. Taamatut nalilersuisinnaajumalluni kommuni qinnuteqaateqartup isertitaasa akiligassaasalu suunerinut tamatigut uppersaataissanik peqartassaaq. Inuuniarnermut ikiorsiissutit uppersaaserneqartariaqanngillat kisiannili kommunimit aalajangerneqarlutik qinnuteqaateqartup inuuniarnerminut tunngavigisai isumannaarniarlugit suut naammassanersut toqqarlugit missingerneqarnerisigut, Pisortanit ikiorsiissutit tunniunneqartarnerat, iliuusissatut pilersaarutit, sulisinnaassuseq il.il. pillugit Namminersornerullutik Oqartussat nalunaarutaat nr. 4, 15. marts 2007-imeersumi § 12 takuuk.

Inuk pisortanit ikiorsiissutinik qinnuteqarluni kommunimut saaffiginnippat kommuni pissaavaoq siunnersuissalluni. Siunnersuissutigineqarsinnaapput inuup qanoq iliorluni aningaasaqarnikkut ajornartorsiutini qaangersinnaanerai siunissamilu imminut ikiorsinnaalernissaa. Inuk atonerluinermik ajornartorsiuteqarpat taamatuttaaq kommuni atonerluisunik katsorsaasarfimmu, nakorsamut allamulluunniit pisariaqartinneqartumik ikiuussinnaasumut innersuussisinnaavoq.

Ullunit 14-init sivisunerusumik pilersuinermut akiligassanullu aalajangersimasunut pisortanit ikiorsiissuteqartoqassappat inuup pisinnaatitaaffigaa inummut namminermut iliuusissanut pilersaarusiortoqarnissaa. Iliuusissanut pilersaarut atorneqassaaq/aqqutissaassaaq inuup imminut napatissinnaalernissaanut.

Inuk immikkut akiligassanut aningaasaqarnikkut ikiorneqarnissaminik atorfissaqartitsiguni ataasiaannartumik akiligassanut pisortanit ikiorneqarnissaminik qinnuteqarsinnaavoq. Ataasiaannartumik akiligassat assersuutigalugu nuunnermut, ilisinermut akiligassanut, ineqarnermik pitsanngorsaanermit il.il. ikiorsiissutaasinnaapput. Kommuni nammineerluni naliliissaaq akiligassanut pineqartunut qanoq annertutigisunik akiliuteqartoqassanersoq.

Apeqqutigisannut inerniliinertut aningaasat inuup 18-it sinnerlugit ukiullip pisortanit ikiorsiissutitut tigusai naliliinikkut aalajangigaasarput inuup inuttut atugarisai apeqqutaatillugit.

Inussiarnersumik inuulluaqqusillunga

Mimi Karlsen